

佛說巨力長者所問大乘經卷下

宋西天同譯經僧法大師賜紫沙門智吉祥等奉 詔譯

佛告長者是諸衆生於多劫中積集諸法  
謂貪瞋癡見慢疑悔於諸欲境觸向迷著  
於晝夜時曾無間斷寂滅靜慮未嘗修習  
生死苦源亦不觀察不了世間生滅之相  
無有自體畢竟歸空但由貪愛積集成種  
假因緣生和合似有因緣勢盡復歸散滅  
由本無明復生貪愛本末相續如蟻循環  
於出世間真實理中諸佛菩薩清淨境界  
無有片心愛樂趣入如是之人愚癡所覆  
於生死海流轉漂沒五塵幻相深心染著  
醉亂顛倒終無醒覺若有衆生善根成熟  
自然親近諸善知識心常修習行二利行  
於諸增上補持伽羅能說法者發希有心

愛樂恭敬不生憍慢於佛功德甚深微妙  
不思議境無疑無謗亦不於諸五塵境中  
虛妄迷執起於貪愛不作衆罪生滅苦因  
晝夜精勤思惟諦實增諸勝行習施等法  
常樂讀誦大乘經典心無邪念無有異想  
法喜禪悅清淨梵行長養法身及資慧命  
不同癡人染著世間但念飲食色身資具  
五欲娛樂常無厭捨不知苦本不求解脫  
著諸外道邪覺邪思正念不生無真實慧  
如說我有清淨寶池若有衆生入中洗浴  
遊戲娛樂如是之人不久當得生諸天上  
如是愚癡執諸異見迷失因果邪妄推求  
顛倒正理修不淨行惡因苦果無解脫時  
汝諸長者應當了知世間因果虛假和合  
如木偶人所作事業而於其中勿生憍慢

帑藏珍財 尊榮豪侈 如夢所見 覺已即空  
而諸愚人 不知此等 生滅幻化 性本空寂  
故於世間 執爲常有 所以者何 由無始來  
起貪瞋癡 纏縛不捨 違順喜怒 無有暫息  
冤家讎對 常現在前 眷屬廣大 財寶豐饒  
密附親近 共成娛樂 增長貪愛 爲苦所因  
後或貧匱 財物散失 乖異別離 愁憂苦惱  
起諸諍訟 及其冤結 至年老大 加諸衆苦  
形色憔悴 諸根衰朽 朋善眷屬 悉皆厭棄  
盛年壯色 耽著五欲 不樂修行 不思厭離  
老病相侵 空懷愁惱 身壞命終 墮於地獄  
牛頭驅責 楚毒辛酸 無救無依 遠歷長劫  
地獄報盡 生餓鬼中 頭如大山 咽如針孔  
不識飲食 皮骨連立 餓鬼報盡 生畜生中  
鱗介羽毛 水陸飛走 遍相搏撮 常懷驚怖

第六

十九

復遭網捕 逃竄無由 鞭杖捶撻 償往宿債  
畜生業盡 或生人中 貧窮卑賤 諸根不具  
資緣乏少 多諸痛苦 設生富貴 福慧乖違  
所有資財 不能受用 或多瞋恚 常苦自心  
或染沉痾 而獲天逝 如是果報 由貪瞋癡  
之所造作 如蠶作蠶 而自纏縛 如蛾戀火  
終致燒然 身心迫惱 無有暫安 惡業相牽  
往來不住 於三惡道 如遊園觀 雖遇衆苦  
無悔惜心 不求解脫 亦無厭捨 受諸罪報  
難堪難忍 窈窈冥冥 告訴無所 當此之時  
父母妻子 一切眷屬 不相替代 唯應自身  
獨受衆殃 從苦入苦 無有休息 如是因緣  
皆由衆生 無始無明 相續發起 貪瞋結使  
動身口意 廣造諸惡 未解悔除 三有業因  
念念增長 汝諸長者 若有衆生 志樂寂靜

希求出離心於所緣染淨平等自然當得業障輕微遠離輪迴雜惡果報於佛正法信樂修習漸能調伏貪瞋癡等亦能觀察了知色身如幻如夢如電如泡畢竟推求終無實處諸有智人應當如是審諦觀察我法皆空而於諸佛真善法中漸次修行施等勝行積集微妙增上正法棄捨凡性克成聖種譬如爲山積土而成又如滴水漸盈大器諸善男子於佛教乘實事理中深忍樂欲於諸世道不可味著捨虛妄法證真實性離生死苦得無畏樂悟彼色相猶如陽焰但誑妄情無實體性如是觀察諸法自相心不顛倒究竟解脫是名名爲菩薩乘性善能安樂一切衆生於佛所行種種行願隨順修學心不退屈精進長時

第六

二十

無有懈廢速能修習六波羅蜜自行檀度不望報恩三輪體空二緣俱泯或於後時皆悉無悔諸根密護不犯尸羅寃對現前亦無加報初中後夜勇猛精進遠離諠煩息諸散亂於善惡品有力思擇身業清淨常現律儀言音柔軟和悅衆心意地無非絕諸覺觀於諸如來所有最上微妙深法則能趣入以善巧智攝受衆生稱彼機宜方便演說各令悟入解脫法門時巨力長者與五百長者聞是法已心大歡喜踊躍無量於所聞法得深法忍得最大忍得無上忍即從坐起繞佛三匝頭面禮足却住一面爾時巨力長者與五百長者等異口同音白佛言世尊我等從昔已來未曾聞是甚深妙法今日乃於無上覺者具一切智者

是諸世間施大法者之所得聞如是妙法由  
 是了知世間諸法唯假施設如幻夢等畢竟  
 歸空悉皆悟入無生法忍發阿耨多羅三藐  
 三菩提心願我當來如今世尊能於無量人  
 天大眾之中作大師子吼顯示微妙清淨法  
 音利益安樂一切眾生世尊我等今者樂欲  
 說偈讚歎如來惟願聽許即於佛前而說偈  
 言

金色微妙相 最勝無與等 能以柔軟音  
 演暢真實義 久修菩薩行 壽命不可量  
 一切諸眾生 見聞皆歡喜 清淨功德聚  
 安處於道場 譬如日天子 常住虛空界  
 皆由往昔中 廣大行布施 謂金銀珍寶  
 象馬及車乘 并頭目髓腦 國城妻子等  
 能行此難行 檀度方圓滿 以本願力故

示現應化身 長時無間斷 過於殫伽劫  
 大悲不思議 哀愍諸群盲 施以甘露法  
 除惱使清涼 我等從多劫 流轉諸有中  
 貪愛於資具 及妻子眷屬 數福無智慧  
 不發菩提心 染著於名聞 并五欲娛樂  
 我等宿福慶 幸得遇世尊 聞此微妙義  
 了知虛幻法 各各得解脫 其心皆安隱  
 願佛聽我等 出家作沙門 當願一切眾  
 盡悟此法門 不著世間樂 速成菩提道  
 爾時巨力長者等說此偈已各各虔誠投佛  
 出家佛乃聽許于時世尊即於座上熙怡微  
 笑以威德力現大神通即於面門放無數光  
 其光雜色猶如眾寶之所間錯所謂青色黃  
 色赤色綠色紫色玻璃色黃金色所放之光  
 遍照無量無邊不可思議阿僧祇世界上至

梵世所有諸天身光及日月光悉皆掩蔽不  
得顯現如是光明照燭之處一切衆生觸是  
光者無不適悅惡業衆生罪障消除盲者能  
視聾者能聞跛者能行啞者能言飢者能滿  
裸者得衣牢獄有情枷鎖免離無有諸惡聖  
境現前是時會中人天大衆身意快樂恠未  
曾有咸作是言以何因緣而現此相各各發  
心從座而起繞佛百千匝已恭敬禮拜供養  
讚歎却住一面爾時衆中尊者阿難徧袒右  
肩右膝著地曲躬恭敬而白佛言世尊是何  
因緣現斯奇瑞今此衆會悉皆有疑各各謂  
言世尊未嘗無因而笑今日如來現此異相  
必有所因如來應供正等正覺大慈大悲願  
爲我等宣說今者佛自莊嚴種種善事衆欲  
樂聞爾時世尊告尊者阿難言如來今日現

斯六

三

斯祥瑞謂欲宣說巨力長者并五百長者悟  
無生法忍發阿耨多羅三藐三菩提心次第  
成佛因緣之事汝當善聽阿難是諸長者已  
於過去無量百千俱胝那由多佛所各各親  
近供養恭敬禮拜尊重讚歎得聞如是最上  
真實法義消除業障遠離三塗於百千劫常  
生人天受勝妙樂乃至於今財富熾盛有大  
眷屬福慧尊嚴人所愛敬由昔所植善根力  
故今於我所復得聞是甚深法義呵難是巨  
力長者并五百長者於當來世得值彌勒如  
來應正等覺於彼佛所復聞清淨大乘妙法  
善能精勤修習菩薩施等六波羅蜜行能於  
十方親近禮拜恭敬供養尊重讚歎無量諸  
佛亦得值遇賢劫諸佛彼佛世尊亦爲宣說  
微妙大乘法義聞已受持復能展轉爲人演

斯六

三

說示教利喜無量衆生阿難是巨力長者過  
是已後經五千劫常生諸佛國土種種修行  
值遇諸佛承事供養無空過者末後當成阿  
耨多羅三藐三菩提盡同一號名曰吉祥藏  
如來應正等正覺明行圓滿善逝世間解無  
上丈夫調御士天人師佛薄伽梵國界莊嚴  
安隱豐樂正法像法壽命劫數皆悉同等說  
法度人不可稱數爾時尊者阿難及人天大  
衆聞佛世尊善說如是微妙法義咸悉讚歎  
復白佛言世尊此經當以何名我等云何受  
持佛告阿難此經名曰巨力長者所問大乘  
經當受持之佛說是經已尊者阿難與音薩  
比丘并巨力長者等及一切世間天人阿修  
羅乾闥婆等聞佛所說皆大歡喜信受奉行  
佛說巨力長者所問大乘經卷下